

आकाशवाणी

- प्रधानमंत्री नरेन्द्र मोदी होरें 60 हजार करोड़ रुपें शा मते दी बक्ख-बक्ख युवा केन्द्रत योजनाएं दी शुरुआत कीती।
- प्रधानमंत्री नरेन्द्र मोदी होरें उनें सब्भे लोकें दे सराहनीय प्रयासें दी तरीफ कीती जिनें “स्वस्थ नारी, सशक्त परोआर” अभियान गी भारत दी नारी शक्ति लेई प्रभावशाली ते लाभकारी बनाने लेई जमीनी स्तर पर अनथक परिश्रम किता।
- गृहमंत्री अमित शाह होरें अगले बरे 31 मार्च तोड़ी देश गी नक्सल समस्या थमां मुक्त करने दे केन्द्र सरकार दे संकल्प गी दोहराया।
- केन्द्र सरकार नै दो बरे थमां घट्ट उम्मी दे बच्चें गी खांसी ते सर्दी दी दवाइयां नेंई देने जां नेंई लिखने दा परामर्श जारी कीता ऐ।
- चुनां आयोग नै औंदे बिहार विधानसभा चुनाएं दी तयारियें लेई राजनीति दलें कन्नै विचार-विमर्श कीता।
- क्रिकेट च भारत नै अहमदाबाद च पैहले टैस्ट मैच च वैस्ट इंडीज गी 1 पारी ते 140 रन्ज कन्नै हराया।

<><><><><><>

PM Koushal Dikshant

प्रधानमंत्री नरेन्द्र मोदी होरें अज्ज नौजवानें लेई 62 हजार करोड़ रुपे शा मती दी लागत आहलियें बक्ख-बक्ख पैहलकदमियें दी शुरुआत कीती, जिन्दे नै देसै च शिक्षा, हुनर ते उद्यमता गी बढ़ावा थोग। नमीं दिल्ली दे विज्ञान भवन च आयोजित कौशल दीक्षांत समारोह च प्रधानमंत्री होरें उद्योगें-कारखानें सरबन्धी सिखलाई देने आहले संस्थानें ITI राएं प्रधानमंत्री कौशल ते रोजगार परिवर्तन “पी.एम सेतु” पैहल दी शुरुआत कीती। इस मौके पर किटठै गी सम्बोधित करदे होई प्रधानमंत्री होरें आखेया जे कोई बी हुनर राष्ट्र दे निर्माण ते विकास च महत्वपूर्ण भूमिका ते योगदान दिंदा ऐ। उनें दस्सेया जे सरकार युवा पीढ़ी गी हुनरमंद बनाइयै उनेंगी भविष्य लेई तयार करा रदी ऐ तां जे स्थाई युवा शक्ति नमियें काहड़ें ते हुनरें कन्नै पूरी चाली लैस होन।

इस मौके पर श्री मोदी हों 34 राज्यों ते केन्द्र शासत प्रदेशें दे 400 नवोदय विद्यालयें ते 200 एकलव्य मॉडल आवसीय विद्यालयें च स्थापित 12 सौ व्यवसायिक कौशल प्रयोगशालाएं दा बी उदघाटन कीता। प्रधानमंत्री हों बिहार दी पुननिर्मित मुख्यमंत्री निश्चय स्वयं सहायता भत्ता योजना दा बी शुभारम्भ कीता। इस योजना तैहत फी बरे कोई 5 लख स्नातक नौजवानें गी निशुल्क कौशल प्रशिक्षण कन्नै 2 बरे तोड़ी इक हजार रुपे दा मासिक भत्ता बी थोग। श्री मोदी हों कौशल विकास ते उद्यमिता मंत्रालय तैहत देशभर दे औद्योगिक प्रशिक्षण संस्थानें दे 46 शीर्ष मेघावी विद्यार्थियों गी बी सम्मानित कीता।

<><><><><><>

PM- Nadda Swasth Abhiyan

प्रधानमंत्री नरेन्द्र मोदी हों अज्ज उनें सब्भनें लोकें दे सराहनीय प्रयास दी तरीफ कीती जिनें “स्वस्थ नारी, सशक्त परोआर” अभियान गी भारत दी नारी शक्ति लेई प्रभावशाली ते लाभकारी बनाने लेई जमीनी सतह पर अनथक परिश्रम कीता ऐ। केन्द्रीय मंत्री जे.पी. नड्डा हुंदी इक सोशल मीडिया पोस्ट दा परता दिंदे होई श्री मोदी हों इस अभियान गी जनभागीदारी दा उत्कृष्ट उदाहरण दसेया। उनें आखेया जे इस चाली दी सामूहिक कारवाई जीवन गी बेहतर बनाने ते स्वस्थ ते सशक्त समाज दे निर्माण दी कूजी ऐ। एदे कोला पैहले केन्द्रीय स्वास्थ्य ते परोआर कल्याण मंत्री जे.पी. नड्डा हों आखेया जे “स्वस्थ नारी, सशक्त परोआर” अभियान नै 6 करोड़ 50 लख महिलायें दी जांच करियै ऐतिहासिक उपलब्धि हासल कीती ऐ। उनें आखेया जे देश भर च कोई 18 लख स्वास्थ्य शिविर आयोजित किते गे।

<><><><><><>

Aapki Punji Apka Adhikar

केन्द्रीय खजाना मंत्री निर्मला सीतारमण हों अज्ज गुजरात दे गांधीनगर थमां राष्ट्रव्यापी “आपकी पूंजी- आपका अधिकार” नां दे अभियान दी शुरुआत कराई। इस अभियान दा मकसद माली प्रणाली दे बख-बख क्षेत्रें च पेई दी लावारिस माली सम्पतियों दा तौले निपटारा यकीनी करना ऐ। किट्ठ गी सम्बोधित करदे होई खजाना

मंत्री होरें आखेया जे एह अभियान लावारिस जमा राशियें दी उन्दे वैध दावेदारें गी उचित वापसी यकीनी करोग।

<><><><><><><><>

Shah -Naxal

केन्द्रीय गृह मंत्री अमित शाह होरें अगले बरे 31 मार्च तोड़ी देश च वामपंथी उग्रवाद थमां मुक्त कराने दे केन्द्र सरकार दे धेइये गी दोहराया। माओवादियें गी हिंसा दा रस्ता छोड़ियै समाज दी मुख्ख धारा च शामिल होने दी अपील करदे होई श्री शाह होरें आखेया जे जेड़े बी हिंसा दे इस रस्ते गी नैई छोड़गंन उनेंगी सुरक्षाबलें आसेया सख्त कदम दा सामना करना पोग। छत्तीसगढ़ च जगदालपुर च बसंतर च अज्ज दशहरा लोकउत्सव गी सम्बोधित करदे होई आखेया जे नक्सलवाद दी मुश्कल करी बसंतर खितें च लम्मे चिरे थमां विकास नैई होई सकेया। तोंआई उनें आखेया जे अगले बरे 31 मार्च दे बाद Bastar च अलगाववाद विकास गी रोकी नैई सकोग।

<><><><><><><><>

Health Advisory

केन्द्री सेहत ते परिवार कल्याण मंत्रालय नै सब्भनें राज्यें ते केन्द्र शासित प्रदेशों गी सलाह जारी कीती ऐ जे बच्चें च खंगू दी पीने आहली दोआइयें दा इस्तेमाल तरीके ते सलीके सिर कीता जाना यकीनी बनान तां जे मरीजें दी सुरक्षा यकीनी बनाने दे कन्नो-कन्नी इंदे गलत इस्तेमाल पर बी रोक लगगी सकै। इक अधिकारिक संदेश दे मताबक सेहत सेवाएं सरबन्धि महानिदेशक होरें आखेया ऐ जे बच्चें च आम तौरा पर निक्की-मुट्टी दी शकैत थोड़ी चिरे लेई गै रौहदी ऐ ते एहदे लेई दोआई लैने दी बी लोड़ नैई पौंदी। उनें आखेया जे आम ठंड, जकाम ते खंग लेई दंऊ बरे कोला हेठली उम्री दे बच्चें गी दोआई भलेयां नैई दिती जानी लोड़चदी, उआं ते 5एं बरे तोड़ी दी उम्री तगर बी एहदे लेई दोआई लैने दी कोई लोड़ नैई हुंदी ते नां गै एहदी सफारश कीती जन्दी ऐ।

<><><><><><><><>

GST -Goods Vehicles

तार्किक ते परिवहन क्षेत्र गी मती राहत दिंदे होई सरकार नै Commercial चीजें दी जियां गड्डियां, ट्रक ते डिलीवरी वैनं पर टैक्स दर घटाई दिती ऐ। GST दर 28 फिसदी थमां घटाइयै 18 फिसदी करी दिती गेई ऐ तां जे लोकें ते दर्मयाने गड्डी चालकें गी लाह पुज्जे ते पूरे देश च चीजें दी आपूर्ति गी बाद्दा थोए। एदे कन्नै गै GST घट्ट होने करी ट्रकें दी कीमत बी घट्टी ऐ ते प्रति टन किलोमीटर साहबै ढोआई दी किमत च कमी आई ऐ।

<><><><><><>

Police Alert –Bareilly

समाजवादी पार्टी दे प्रतिनिधिमंडल दे बरेली दी हिंसा प्रभावित इलाकें दे दौरे गी दिखदे होई बरेली ते आहले-दोआले दे जिलें च पुलस हाई अलर्ट पर ऐ। 26 सितम्बर गी शहरै च होई दी हिंसा दे सिलसिले च पुलस नै हुने तोड़ी 83 लोकें खलाफ कारवाई कीती ऐ। SP City मानुष परीक होरें दस्सेया जे तौकीर रज़ा दा मीडिया ते संचार विभाग सम्भालारदे मुनीर इदरासी गी बी गिरफ्तार करी लैता गया ऐ। तोंआई राज्य विधानसभा च विपक्ष दे नेता माता प्रसाद पांडे ते समाजवादी पार्टी दे सांसद जिया उर-रहमान गी बी पुलस नै बरेली जाने थमा रोकी दिता। प्रतिनिधिमंडल गी ऐसे कुसै बी दौरे दी अनुमति नैई दिती गेई ऐ।

<><><><><><>

SMVD-Yatra Suspension

मौसम विभाग आसेयी मौसम दे खराब रौहने बारे जारी जानकारी गी ध्यानै च रखदे होई श्री माता वैष्णो देवी श्राईन बोर्ड नै माता वैष्णो देवी जी दी यात्रा 5 कोला 7 अक्टूबर तोड़ी स्थगित रखने दा फैसला लैता ऐ। उआं 8 अक्टूबर गी एह यात्रा परतियै ब्हाल करी दिती जाहग। बोर्ड मुजब त्रंऊ दिनें लेई यात्रा रोकने दा फैसला श्रद्धालुएं दी सुरक्षा ते सलामती गी ध्यानै च रखदे होई एहतियात दे तौरा पर लैता गया ऐ। यात्रियें गी सलाह दिती गेदी ऐ जे ओ यात्रा शुरु करने कोला पैहले श्राईन बोर्ड दी अधिकारिक वेबसाईट जां होर संचार माध्यमें राए ताजा स्थिति बारे जानकारी हासल करी लैन।

श्राईन बोर्ड नै इस फैसले कन्नै लोके गी होने आहली असुविधा लेई मुआज़रत जाहर करदे होई सब्भनै अगगे सहयोग करने दी बी अपील कीत ऐ।

<><><><><><>

ECI -Bihar

चुना आयुक्त Gyanesh Kumar हुंदे नेतृत्व च आयोग दे दल नै अज्ज बिहार च होने आहले विधानसभा चुना दी तयारिये लेई राजनीतिक दले कन्नै विचार-विमर्श कीता। बैठक च भारतीय जनता पार्टी, जनता दल -यू, राष्ट्रीय जनता दल, कांग्रेस, खबे धड़े ते होरने राजनीतिक दले दे प्रतिनिधिमंडले नै स्वतंत्र ते निरपक्ष चुना लेई अपने विचारें ते सुझाव पेश कीते। सतारुढ़ BJP नै घट्ट चरणे च चुनां करोआने दी मंग कीती ऐ। प्रदेश BJP अध्यक्ष डाक्टर Dilip Jaiswal होरे अधिकतम दो चरणे च मतदान कराने दा आग्रह कीता। उने आखेया जे पार्टी दी मंग ऐ जे चुना अगले महीने दी 3 या 4 तरीख दे बाद कराए जान। चुना आयोग दा दल प्रशासनिक ते पुलिस अधिकारिये कन्नै इक उच्च स्तरीय समीक्षा बैठक करा रदे न।

<><><><><><>

World Leaders –Hamas

विश्व नेताएं अज्ज गाजा च बंधक बनाए गेदे सब्भे लोके गी रिहा करने दे हमास दे फैसले ते अमरीका दे नेतृत्व आहले शांति प्रस्ताव पर अमल करने दी ओदी इच्छा दा स्वागत कीता। उने इसी मजूदा संघर्ष च इक संभावित मोड़ दे रुपै च दिखेया ऐ। एह घोषणा अमरीकी राष्ट्रपति डोनाल्ड ट्रम्प आसेया नमें सिरेया किते गेदे कूटनीतिक प्रयासे दे बाद आई ऐ। श्री ट्रम्प होरे इस हफ्ते दी शुरुआत च इजरायल ते हमास बश्कार युद्ध गी सुलझाने दे उद्देश्य थमां इक 20 सूत्रीय शांति योजना दा प्रस्ताव कीता हा। ब्रिटिश प्रधानमंत्री कीर-स्टारमर होरे हमास दे इस कदम गी शत्रुता खत्म करने दी दिशा च इक बड़डा कदम दस्सेया। उने अमरीकी पैहल दे प्रति समर्थन व्यक्त कीता ते युद्धविराम गी सुगम बनाने, बंधके दी वापसी यकीनी करने ते गाजा च नागरिके तोड़ी मानवीय सहायता पुजाने लेई योजना दे कार्ययान्वित दे महत्व पर बल दिता। फ्रांस दे राष्ट्रपति Emmanuel मैको होरे तवरित कारवाई दी जरूरत पर बल दिता ते इस गल्ल पर लौ पाई जे युद्धविराम ते बंधके दी रिहाई दी शर्ता हुन पुज्ज च न।

<><><><><><>

Japan Women PM

साने ताकाइची होरें गी अज्ज जापान दी सतारुढ़ Liberal Democratic Party दी नेता चुनेया गया ऐ। ओ 15 अक्तूबर गी जापान दी पैली महिला प्रधानमंत्री बनने आहलियां न। जापान दी साबका आर्थिक सुरक्षा मंत्री ताकाइची होरें कृषि मंत्री शिंजिरी कोइजुमी होरें गी दुए दौर दे चुना च हराया ऐ। शुरुआती दौर दे मतदान च 5 मेदवारें चां कुसे गी बी बहुमत नैई थोआ हा। पिच्छले महीने प्रधानमंत्री शिगेरु इशिबा दे इस्तीफें दे बाद एह चुनां होआ हा।

<><><><><><>

Cricket Test

क्रिकेट च भारत नै वैस्ट इंडीज गी इक पारी ते 140 रन्जें कन्नै पैहले टेस्ट मैच च हराया। ए मैच अज्ज नरेन्द्र मोदी स्टेडियम, अहमदाबाद च होया। भारत नै 2 मैचें दी श्रृंखला च 1-0 दी बढ़त हासल करी लैती ऐ। परौहनी टीम गी 162 रन्ज पर आउट करियै, भारत नै 448 रन्जें पर अपनी पारी दी समाप्ति दी घोषणा करी दिती। वैस्ट इंडीज नै दुई पारी च बी अच्छा प्रदर्शन नैई किता ते 146 रन्ज गै बनाई सकी। भारत दे गेंदबाजें महोम्मद सिराज ते रविन्द्र जड़ेजा नै बेहतरीन प्रदर्शन कीता। वैस्ट इंडीज पर लगातार बनाए गेदे दबाव दे चलदे त्रीए रोज भारत गी जित हासल होई गई ते जड़ेजा गी मैन ऑफ द मैच घोषिता कीता गया।

<><><><><><>

Women Cricket

ICC महिला इक दिवसीय विश्व कप क्रिकेट च कल कोलंबो च भारत दा सामना पाकिस्तान कन्नै होग। भारतीय टीम दा इक दिवसीय मैचें च पाकिस्तान दे खलाफ 11-0 दा रिकार्ड ऐ। प्रतियोगिता दे पैहले मैच च भारत नै श्रीलंका गी 59 रन्ज कन्नै हराया हा। पाकिस्तान, बंगलादेश थमां 7 विकेट कन्नै हारी गया हा।

<><><><><><>

Weather

जम्मू-कश्मीर UT आपदा प्रबंधन प्राधिकरण JKUTDMA नै शनिवारे SMS राएं इक जरूरी मौसम सरबन्धी सलाह लोकें कन्नै सांझा कीती, जेदे च जम्मू संभाग दे दक्खन कश्मीर दे केंई क्षेत्रें च भारी बरखा पौने दी चेतावनी दिती गेई ऐ। मौसम दे ए हालात 5 अक्टूबर शामी कोला लेइयै 7 अक्टूबर दपैहरी तोड़ी बने दे रौहगंन। भारी बरखें दे चलदे दरम्यानी थमां खरी मती बर्फबारी बी दक्खन कश्मीर, पीर पंजाल रेंज ते चिनाब घाटी दी उच्ची थाहरें पर होई सकदी ऐ। असुरक्षित थाहरें पर पस्सी पौने ते पत्थर रुढ़ने दा खतरा बी बनी सकदा ऐ। इन्नै क्षेत्रें च रवारदे लोकें ते सफर पर जा रदे लोकें एहतियात बरतने दी लोड़ ऐ।

<><><><><><>